

14-July-2026

आकाशवाणी

खबरां श्रुति खजूरिया कोला

पैहले खास-खास खबरां:-

1. भारत नै संयुक्त राष्ट्र सुरक्षा परिषद दे अस्थायी सदस्य दे तौर पर बरे 2028-29 दे कार्यकाल लेई अपना चुना अभियान आधिकारिक तौर पर शुरु कीता।
2. वियतनाम दे फू क्वोक द्वीप कश होए दे स्पीड बोट हादसे च मारे गेदे 15 भारतीय सैलानिये दे पार्थिव शरीर भारत आने गे।
3. पच्छिम बंगाल च मच्छली फगड़ने आहली किशती बंगाल दी खाड़ी च पलटी। 9 मच्छुआरे दी मौत, 6 होर लापता।
4. अमरीकी राष्ट्रपति होरे होर्मुज जल डमरु मध्य च ईरानी जहाजे दी फीह नाकेबंदी दी घोषणा कीती। इस महत्वपूर्ण समुन्द्री रस्ते राए लंघने आहले माल पर 20 फीसद शुल्क लाया।
5. भारतीय मौसम विभाग नै अज्ज बिहार ते ओडिशा च भारी थमां भारी बरखा पौने दी पेशगोई कीती।
6. भारतीय महिला क्रिकेट टीम नै लॉर्डस दे मैदान च खेड्डे गेदे टेस्ट क्रिकेट मैच च 270 रन्ज दी मात देइयै इतिहास रचेआ।

<><><><><>

India -UNSC

भारत ने 2028-29 कार्यकाल आस्तै संयुक्त राष्ट्र सुरक्षा परिषद दे अस्थायी सदस्य दे रुप च चुना लेई आधिकारिक तौरा पर अपना अभियान शुरु करी दिता ऐ। विदेश मंत्री डाक्टर सुब्रह्मण्यम जयशंकर ने कल राती न्यूयार्क स्थित संयुक्त राष्ट्र मुख्यालय च वैश्विक शांति, सुरक्षा ते विकास गी बढ़ावा देने लेई भारत दा शांति आहला नज़रिया पेश कीता। उ''ने आखेआ के वैश्विक संघर्ष ते अस्थिरता दे बशकार संयुक्त राष्ट्र दी भूमिका पैहले थमां होर मती महत्वपूर्ण होई गेई ऐ। डाक्टर जयशंकर होरे आखेआ जे भारत ने संयुक्त राष्ट्र दे तकरीबन 50 शांति अभियाने च लगभग 3 लक्ख सुरक्षा कर्मिये दा योगदान दिता ऐ ते वर्तमान च 10 संयुक्त राष्ट्र शांति अभियाने च 4 जहार 3 सौ शा मते सुरक्षाकर्मी अपनी सेवा देआ रदे न।

<><><><><>

Mortal Remains Vietnam

वियतनाम दे फू क्वोक द्वीप कश होए दे स्पीड बोट हादसे च मारे गेदे 15 भारतीय सैलानिये दे पार्थिव शरीर स्वदेश आने गे न। वियतनाम च भारतीय दूतावास नै इक सोशल मीडिया पोस्ट च दस्सेआ जे एह पार्थिव शरीर वियतनाम एयर लांड्स राए मुम्बई पुज्जे। दूतावास नै आखेआ ऐ जे आंध्र प्रदेश, केरल ते तमिलनाडू दी सरकारें इने''गी उन्दे सरबन्धि राज्ये च उन्दे घरे तगर पजाने च मदद करडन। वियतनाम दे अधिकारिये ते सरकार प्रति आभार जतांदे होई दूतावास नै दस्सेआ जे उन्दी प्रार्थना, जल्न ते मौजूदगी नै इस दुख दी घड़ी च शक्ति प्रदान कीती। 32 भारतीय सैलानिये ते 4 मुकामी कू दे सदस्ये आहली स्पीड बोट शुक्रवारें हादसे दा शिकार होई गेई ही। एदे च 15 सैलानिये दी मौत होई ही। हादसे च बचने आहले 16 सैलानी भारती परतोई चुके दे न। इक सैलानी वियतनाम दे अस्पताल च ऐ।

<><><><><>

पच्छिम बंगाल च मच्छली फगड़ने आहली इक किशती बंगाल दी खाड़ी च पलटी गई। एदे च 9 मछुआरें दी मौत होई गई ते 6 होर लापता होई गे न। एह किशती 2 जुलाई गी शंकरपुर समुन्द्री बंदरगाह थमां 15 मछुआरें कन्नै खाना होई ही। 5 जुलाई गी किशती कन्नै सम्पर्क त्रुटी गोआ तट-रक्षक बल, भारतीय नौ-सेना ते राज्य एजेंसियें सांझा तलाशी अभियान चलाया। एतवारें बंगाल दी खाड़ी च पलटी दी किशती दा पता लग्गा। 9 लोथें गी बरामद करी लैता गोआ ऐ। 6 होर लोक लापता न। लोथें गी दक्खण 24 परगना जिले दे सीता रामपुर आनेआ गोआ ऐ। DNA दे मिलान आस्तै परोआरें दे सदस्यें दे खून दे नमूने लैते गे न। राज्य सरकार दे मच्छी पालन सरबन्धी मंत्री राजेश महतो होरें आखेआ जे राज्य सरकार सोगी परोआर दे लोकें कन्नै ऐ। राष्ट्रपति द्रोपदी मूरमु, उप-राष्ट्रपति सी.पी. राधाकृष्णन ते प्रधानमंत्री नरेन्द्र मोदी होरें इस हादसे पर डूंगा दुख ते बसोस जाहिर कीता ऐ। प्रधानमंत्री होरें मारे गेदे हर व्यक्ति दे नेडमें रिश्तेदार आस्तै प्रधानमंत्री राष्ट्रीय राहत कोष थमां 2-2 लक्ख रपे ते घायले लेई 50-50 जहार रपे दी इमदाद देने दी घोषणा कीती ऐ।



NEET

राष्ट्रीय परीक्षा एजेंसी नै NEET UG 2026 दे होए दे परतिपे इम्तेहान दी OMR शीट ते रिकार्ड कीते गेदे जवाब जारी करी दिते न। एजेंसी नै दस्सेआ ऐ जे मेदवार NTA दी वेबसाईट neet.nta.nic.in पर अपने आवेदन नम्बर लॉग इन करिए अपनी OMR शीट ते जवाब दिखी सकदे न। मेदवार अपने चुने गेदे परते दी तुलना स्कैनर आसेआ पढ़े गेदे परते कन्नै करी सकदा ऐ, जेकर कोई परता मेल नैई खन्दा ऐ तां मेदवार सोआल दी ताल करिए अपने चुने गेदे विकल्प पर निशान लाई सकदा ऐ ते ते 200 रपे दा शुल्क देइए चुनौती देई सकदा ऐ। OMR चुनौती सुविधा इस महीने दी 15 तरीक तगर उपलब्ध होग। मेदवार NTA Helpline no.

011-40759000 ते 011-69227700 पर सम्पर्क करी सकदा ऐ।



PM- MKB

प्रधानमंत्री नरेन्द्र मोदी होर इस महीने दी 26 तरीक गी आकाशवाणी पर प्रसारित होने आहले महावार कार्यक्रम “मन की बात” राएं देश-विदेश दे लोकें कन्नै अपने विचार-सांझा करडन। एह इस महावार रेडियो कार्यक्रम दी 136मी कड़ी होग। लोक इस कार्यक्रम लेई अपने विचार ते सुझास टोल फ्री नम्बर- 1800-11-7800 पर भेजी सकदे न। लोक अपने सुझा ऑनलाईन नरेन्द्र मोदी ऐप्प ते My Gov. Open Forum पर बी भेजी सकदे न। लोक 1922 पर मिसड कॉल करिए एस.एम.एस. राएं थहोए दे लिंक पर जाइयै बी अपने सुझास ते संदेश देई सकदे न। इस कार्यक्रम लेई सुझा 24 जुलाई तगर दिते जाई सकदे न।



US-Iran

अमरीका दे राष्ट्रपति डोनाल्ड ट्रम्प होरें घोषणा कीती ऐ कि अमरीका होर्मुज जल डमरु च ईरानी जहाजें दी परतियै नाकेबंदी करोग। एहदे इलावा अमरीका समुन्द्री सुरक्षा दा खर्चा चुक्कने लेई इस महत्वपूर्ण समुन्द्री रस्ते सवां लंगगने आहले माल पर 20 प्रतिशत टैक्स लाग। अपनी इक सोशल मीडिया पोस्ट पर ट्रम्प होरें आखेआ ऐ कि एह रोक छड़ी ईरानी जहाजें ते ईरान कन्नै बपार करन आहलें जहाजें पर लागू होग। उ”नै इब्बी आखेआ कि होर्मुज जल डमरु खुल्ला ऐ ते ईरान कन्नै ते ओहदे बिजन बी खुल्ले दा रौहग। ट्रम्प

होरें भरोसा दोआया कि होरनें मुख्यें दे कारोबारी ज्हाजें दी आओ-जाई बिजन कुसै रोक-टोक दे जारी रौहग। एह घोषणा होर्मुज जल डमरु च ज्हाजें पर ईरानी हमले दे बाद परतियै पैदा तनोतनी दी स्थिति ते चलदे कीती गई ऐ।

<><><><><>

IMD

मौसम विभाग नै अज्ज बिहार ते ओडिशा च मौलाधार बरखा पौने दी पेशनगोई कीती ऐ। इनें क्षेत्रें च कल तगर तेज बरखा जारी रौहने दी संभावना ऐ। पूर्वोत्तर भारत, छत्तीसगढ़, झारखंड, पच्छिम बंगाल ते सिक्किम दे किश हिस्से च बी दिने तेज बरखा होई सकदी ऐ। मौसम विभाग मूजब अज्ज अंडमान ते निकोबार द्वीप समूह, आंध्र प्रदेश, जम्मू ते कश्मीर, लद्दाख, बिहार, पश्चिम बंगाल दे गांगेय क्षेत्र झारखंड, सिक्किम, कर्नाटक ते ओडिशा दे किश हिस्से च बिजली ते तेज हवा कन्ने बरखा होने दी संभावना ऐ। विभाग नै तटीय आंध्र प्रदेश दे किश हिस्से च अज्ज लू चलने दी संभावना जाहिर कीती ऐ।

<><><><><>

Bihar Militant

बिहार दे कटिहार च कोढ़ा पुलस थाने आहले इलाके दे मुसापुर गां थमां पुलसै पाकिस्तान दे आतंकी नैटवर्क कन्ने जुड़े दे इक संदिग्ध व्यक्ति गी गिरफ्तार कीता ऐ। कटिहार दे सदर-2 उपमंडल पुलस अधिकारी सुनील कुमार शर्मा होरें दस्सेआ जे एह व्यक्ति सोशल मीडिया चैट ते ऑडियो कॉल राएं देश विरोधी गतिविधियें ते संवेदनशील थाहरें बारे जानकारी सांझा करा'रदा हा।

<><><><><>

Amarnath Yatra

जंदे रोज श्री अमरनाथ जी यात्रा च मुख्यें दे बक्ख-बक्ख हिस्से थमां तकरीबन 24 जहार श्रद्धालुएं श्री अमरनाथ जी हुंदी पवितर गुफा च मत्था टेकेया। अधिकारियें दस्सेआ जे 3 जुलाई गी शुरु होई दी 57 दिनें दी सलाना श्री अमरनाथ जी यात्रा दे अज्ज 12में ध्याड़े मेद ऐ जे पवित्र गुफा च मत्था टेकने आले यात्रुएं दी गिनतरी 3 लक्ख दा आंकड़ा पार करी जाग।

तौआई श्री अमरनाथ जी श्रद्धालुएं दा 13मां जत्था अज्ज बड़लै सखत सुरक्षा बंदोबस्ते हेठ जम्मू दे भगवती नगर “यात्री निवास” आधार शिविर थमां कश्मीर घाटी लेई रवाना होआ। साढ़े संवाददाता दी रिपोर्ट मुजब, 232 गड़्डियें दे काफिले च रवाना होए दे इस जत्थे च कुल 5 जहार 335 श्रद्धालू न, जिंदे चा इक जहार 736 श्रद्धालू बालटाल लेई ते 3 जहार 599 श्रद्धालू पैहलगाम लेई रवाना होए दे न। इस जत्थे च कुल 3 जहार 911 मर्द, 1 जहार 288 महिलां, 21 बच्चे, 90 साधु, 24 साध्वियां ते इक ट्रांसजेंडर यात्रु शामिल हे।

<><><><><>

Women Cricket

भारतीय महिला क्रिकेट टीम नै कल लॉर्डस च इंग्लैंड खिलाफ टेस्ट इतिहास दी सब्बनें थमां बड़्डी जित्त दर्ज करिए इतिहास रची दिता ऐ। भारत नै इंग्लैंड गी 270 रन्ज कन्ने करारी शिकस्त देइयै इक मात्र टेस्ट श्रृंखला अपने नांs कीती। 457 रन्ज दे बड़्डे लक्ष्य दे परते च खीरले दिन इंग्लैंड 186 रन्ज पर ऑल आउट होई गई। भारत दी पिच्छले 11 टेस्ट मैचें च एह 7मी जित ऐ। एदे कन्ने गै इंग्लैंड च महिला टेस्ट मैचें च उन्दा अजय रिकार्ड बी बरकरार रेआ। खेड्ड मंत्री मनसुख मांडविया होरें भारतीय महिला क्रिकेट टीम गी

बदाई दिती। केन्द्रीय मंत्री पीयूष गोयल, किरेन रिजिजू ते ज्योतिरादित्य सिंधिया होंरें भारतीय क्रिकेट कंट्रोल बोर्ड दे कन्नो-कन्नी टीम गी शुभकामनां दितियां।

<><><><><>

Cricket

भारत ते इंग्लैंड दे बश्कार त्रै मैचें दी इक रोजा क्रिकेट श्रृंखला दा पैहला मुकाबला अज्ज बर्मिंघम दे एजबेस्टन मैदान च खेड्ढेया जाग। मैच भारतीय समें मताबक 3 बजे शुरु होग। भारतीय टीम च बल्लेबाजी विराट कोहली ते रोहित शर्मा सनें तेज गेंदबाज जसप्रीत बुमराह दी बी टीम च वापसी होआ रदी ऐ। आयरलैंड ते इंग्लैंड दे खिलाफ टी-20 श्रृंखलाएं च मिली दी हार दे पैरन्त भारत वापसी करने दी कोशिश करोग। शुभमन गिल दी अगुआई आहली टीम वीरवारें कार्डिफ च दुआ इक रोजा मैच खेड्ढोग, जिसले के श्रृंखला दा त्रीया ते अखीरला मुकाबला 19 जुलाई गी लॉर्डस च खेड्ढेआ जाग।

<><><><><>

Read by	:	Shruti Khajuria
Stand by	:	Kunal Shrivatsa
D.E.O.	:	Rajni Devi
Skilled	:	Rajat Paul
Editor	:	Abhilasha Sharma